

八

編

類

纂

八編類纂卷之一百二十五

經濟編

人類

道術

道德

德有六理何謂六理曰道德性神明命此六者德之理也諸生者皆生于德之所生而能人象德者獨玉也寫德體六理盡見于玉也各有狀是故以玉効德之六理澤者鑑也謂之道踞如竊膏之理謂之德湛而潤厚而膠謂之性康若樂流謂之神光輝謂之明晷乎堅哉謂之命此之謂六理鑑生空竅而通之以

道德生理通之以六德之畢離狀六德者德之有六
理理離狀也性生氣而通之以曉神生變而通之以
化明生識而通之以知命生形而通之以定德有六
美何謂六美有德有道有仁有義有忠有密此六者
德之美也道者德之本也仁者德之出也義者德之
理也忠者德之厚也信者德之固也密者德之高也
故物有清而澤澤者鑑也鑑以道之神擗貫物形通
達空竅奉一出入爲先故謂之鑑鑑者所以能也見
者目也道德施物精微而爲目是故物之始形也分
先而爲目目成也形乃從是以人及有因之在氣莫

精于目目清而潤澤若濡無毳穢襍焉故能見也由
此觀之自足以明道德之潤澤矣故曰澤者鑑也生
空竅通之以道德者離無而之有故潤則倨然濁而
始形矣故六理發焉六理所以爲變而生也所生有
理然則物得潤以生故謂潤德德者變及物理之所
出也未變者道之頌也道水凝而爲德神載于德者
道之澤也道雖神必載于德而頌乃有所因以發動
變化而爲變變及諸生之理皆道之化也各有條理
以載其德德受道之化而發之各不同狀德潤故曰
如膏謂之德德生理通之以六德之畢離狀性者道

德造物物有形而道德之神專而爲一氣明其潤益厚矣濁而膠相連在物之中爲物莫生氣皆集焉故謂之性性神氣之所會也性立則神氣曉曉然發而通行于外矣與外物之感相應故曰澤厚而膠謂之性性生氣通之以曉神者道德神氣發于性也康若樂流不可物效也變化無所不爲物理及諸變之起皆神之所化也故曰康若樂流謂之神理生變通之以化明者神氣在內則無光而爲知明則有輝于外矣外內通一則爲得失事理是非皆職于知故曰光輝謂之明明生識通之以知命者物皆得道德之施

以生則澤潤性氣神明及形體之位分數度各有極量指奏矣此皆所受其道德非以嗜欲取捨然也其受此具也粿然有定矣不可得辭也故曰命命者不得母生生則有形形而道德性形神明命因載于物形故粿堅謂之命命生形通之以定物所道始謂之道所以生謂之德德之有也以道爲本故曰道者德之本也德生物又養物則物安利矣安利物者行仁也仁行出于德故曰仁者德之出也德生理理立則有宜適之謂義義者理也故曰義者德之理也德生物又養長之而弗離也得以安利德之遇物也忠

厚故曰忠者德之厚也。德之忠厚也。信固而不易。此德之常也。故曰信者德之固也。德生于道而有理。守理則合于道。于道理密而弗離也。故能物畜養。養其不仰恃德。此德之高而弗失。則有道矣。得而守之。則有德矣。行而無失。則行成矣。

賈誼道德說

神術者接物之隊。凡權重者必謹于事。令行者必謹于言。則過敗鮮矣。此術之接物之道者也。其爲原無屈。其應變無極。故聖人尊之。

道術篇

故心不憂樂。德之至也。通而不變。靜之至也。嗜而不載。虛之至也。無所好憎。平之至也。不與物散。粹之至也。

也能此五者則通于神明通于神明者得其內者也
是故以中制外百事不廢中能得之則外能收之中
之得則五藏寧思慮平筋力頸強耳目聰明疏達而
不悖堅強而不鞿無所大過而無所不逮處小而不
過處大而不窳其魂不躁其神不燒湫滲寂寞爲天
下梟大道坦坦去身不遠求之近者往而復反近謂
身也迫則能應感則能動物穆無窮變無形像優游
委縱如響之與景登高臨下無失所秉履危行險無
忘玄仗能存之此其德不虧萬物紛糅與之轉化以
聽天下若背風而馳是謂至德至德則樂矣古之人

有居巖穴而神不遺者、末世有勢爲萬乘而日憂悲者、由此觀之、聖亡乎治人、而在于得道、樂亡乎富貴、而在于德和、知大已而小天下、則幾于道矣、夫建鐘鼓、列管絃、席旃茵、傳旄象耳、聽朝歌、北鄙靡靡之樂、齊靡曼之色、陳酒行觴、夜以繼日、強弩弋高鳥、走犬逐狡兔、此其爲樂也、炎炎赫赫、怵然若有所誘、慕解車休馬、罷酒徹樂、而心忽然若有所喪、悵然若有所亡、也是何則、不以內樂外、而以外樂內、樂作而喜曲終而悲、悲喜轉而相生、精神亂、營不得須臾、平察其所以不得其形、而日以傷生、失其得者也、夫形者生

之舍也。氣者生之充也。神者生之制也。一失位則三者傷矣。是故聖人使人各處其位。守其職而不得相干也。故夫形者非其所安也。而處之則廢。氣不當其所充而用之則泄。神非其所宜而行之則昧。此三者不可不慎守也。夫舉天下萬物。蚊虻貞蟲。蠕動蚊作。皆知其所喜憎利害者。何也。以其性之在焉而不離也。忽去之。則骨肉無倫矣。今人之所以眊然能視。瞽然能聽。形體能抗而百節可屈伸。察能分白黑。視醜美而知能別同異。明是非者。何也。氣爲之充。而神爲之使也。何以知其然也。凡人之志各有所在。而神有

所繫者其行也足蹟趑跼頭抵植木而不自知也招之而不能見也呼之而不能聞也耳目去之也然而不能應者何也神失其守也故在于小則忘于大在于中則忘于外在于上則忘于下在于左則忘于右無所不充則無所不在是故貴虛者以毫末爲宅也今夫狂者之不能避水火之難而越溝瀆之險者豈無形神氣志哉然而用之異也失其所守之位而離其外內之舍是故舉錯不能當動靜不能中終身運枯形于連轡列埒之門而蹟蹈于污壑奔陷之中雖生俱與人鈞然而不免爲人戮笑者何也形神相失

也故以神爲主者形從而利以形爲制者神從而害
貪饕多欲之人漠暗于勢利諂慕于名位冀以過人
之智植于高世則精神日耗而彌遠久淫而不還形
閉中距則神無由入矣是以天下時有盲妄自失之
患此膏燭之類也火逾然而消逾亟夫精神氣志者
靜而日充者以壯躁而日耗者以老是故聖人將養
其神和弱其氣平夷其形而與道沈浮俛仰恬然則
縱之迫而用之其縱之也若委衣其用之也若發機
如是則萬物之化無不遇而百事之變無不應

劉安
原道

訓

是故與至人居使家忘貧使王公簡其富貴而樂卑
賤勇者衰其氣貪者消其欲坐而不教立而不議虛
而往者實而歸故不言而能飲人以和是故至道無
爲一龍一蛇盈縮卷舒與時變化外從其風內守其
性耳目不耀思慮不營其所居神者臺簡以游太清
引循萬物群美萌生是故事其神者神去之休其神
者神居之今盆水在庭清之終日未能見睂睫濁
之不過一撓而不察方員人神易濁而難清猶盆水
之類也況一世而撓滑之曷得須臾平乎

淑真訓

養生

衆人之用神也躁躁則多費多費之謂侈聖人之用神也靜靜則少費少費之謂嗇嗇之爲術也生于道理夫能嗇也是從于道而服于理者也衆人離于患陷于禍猶未知退而不服從道理聖人雖未見禍患之形虛無服從于道理以稱蚤服故曰夫謂嗇是以蚤服知治人者其思慮靜知事天者其孔竅虛思慮靜故德不去孔竅虛則和氣日入故曰重積德夫能令故德不去新和氣日至者蚤服者也故曰蚤服是謂重積積德而後神靜神靜而後和多和多而後計得計得而後能御萬物能御萬物則戰易勝敵戰易

勝敵而論必蓋世論必蓋世故曰無不克無不克本
于重積德故曰重積德則無不克戰易勝敵則兼有
天下論必蓋世則民人從進兼天下而遠從民人其
術遠則衆人莫見其端木莫見其端木是以莫知其
極故曰無不克則莫知其極

韓非精神篇

始生之者天地養成之者人也能養天之所生而勿
撓之謂天子天子之動也以全天爲故者也此官之
所自立也立官者以全生也今世之惑主多官而反
以害生則失所爲立之矣譬之若修兵者以備寇也
今修兵而反以自攻則亦失所爲修之矣萬人操弓

共射其一招招無不中萬物章章以害一生生無不傷以便一生生無不長

呂覽本生篇

不達乎性命之情慎之何益是師者之愛子也不免乎枕之以糠是聾者之養嬰兒也方雷而窺之于堂有殊弗知慎者使烏獲疾引牛尾尾絕力勦而牛不可行逆也使五尺豎子引其捲而牛恣所以之順也世之人主貴人無賢不肖莫不欲長生久視而日逆其生欲之何益凡生長也順之也使生不順者欲也故聖人必先適欲室大則多陰臺高則多陽多陰則廢多陽則痿此陰陽不適之患也是故先王不處大

室不爲高臺，味不衆珍，衣不燂熱，燂熱則理寒，理寒則氣不達，味衆珍則胃充，胃充則中大鞫，中大鞫而氣不達，以此長生可得乎。重已篇

聖人深慮天下莫貴于生，夫耳目鼻口生之役也，耳雖欲聲，目雖欲色，鼻雖欲芬香，口雖欲滋味，害于生則止，在四官者不欲，利于生者則弗爲，由此觀之，耳目鼻口不得擅行，必有所制，譬之若官職，不得擅爲，必有所制，此貴生之術也。堯以天下讓于子州父，子州父對曰：「以我爲天子，猶可也；雖然，我適有幽憂之病，方將治之，未暇在天下也。」天下重物也，而不

以害其生又况于他物乎惟不以天下害其生者也可以託天下越人三世殺其君王子搜患之逃乎丹穴越國無君求王子搜而不得從之丹穴王子搜不肯出越人薰之以艾乘之以王與王子搜援綬登車仰天而呼曰君乎獨不可以舍我乎王子搜非惡爲君也惡爲君之患也若王子搜者可不謂以國傷其生矣此固越人之所欲得而爲君也魯君聞顏闔得道之人也使人以幣先焉顏闔守閭鹿布之衣而自飯牛魯君之使者至顏闔自對之使者曰此顏闔之家耶顏闔對曰此闔之家也使者致幣顏闔對曰恐

聽繆而遺使者罪不若審之使者還反審之復來求之則不得已故若顏闔者非惡富貴也由重生惡之也世之人主多以貴富驕得道之人其不相知豈不悲哉故曰道之貞以持身其緒餘以爲國家其土直以治天下由此觀之帝王之功聖人之餘事也非所以完身養生之道也今世俗之君子危身棄生以徇物彼且奚以此之也彼且奚以此爲也凡聖人之動作也必察其所以之與其所以爲今有人于此以隨侯之珠彈千仞之雀世必笑之是何也所用重所要輕也夫生豈特隨侯珠之重也哉

聖人之所以異者得其情也由貴主動則得其情矣不由貴生動則失其情矣此二者死生存亡之本也古人得道者生以壽長聲色滋味能久樂之奚故論早定也論早定則知早耆知早耆則精不竭秋早寒則冬必煖矣春多雨則夏必旱矣天地不能雨而況于人類乎人之與天地也同萬物之形雖異其情一體也故古之治身與天下者必法天地也尊酌者衆則速盡萬物之酌大貴之生者衆矣故大貴之生常速盡非徒萬物酌之也又損其身以資天下之人而終不自知功雖成乎外而生虧乎內

情欲篇

耳目者日月也血氣者風雨也日中有踰鳥而月中有蟾蜍日月失其行薄蝕無光風雨非其時毀折生災五星失其行州國受殃夫天地之道至絃以大尚猶節其章光愛其神明人之耳目曷能久熏勞而不息乎精神何能久馳騁而不旣乎是故血氣者人之華也而五藏者人之精也夫血氣能專于五藏而不外越則胸腹充而嗜慾省矣胸腹充而嗜慾省則耳目清聽視達矣耳目清聽視達謂之明五藏能屬于心而無乖則教志勝而行不僻矣教志勝而行之不僻則精神盛而氣不散矣精神成而氣不散則理理

則均均則通通則神神則以視無不見以聽無不聞也。以爲無不成也。人之所以不能終其壽命而中道夭于刑戮者何也。以其生生之厚。夫惟能無以生爲者。則所以修得生也。夫造化者之攬援物也。譬猶陶人之埏埴也。其取之地而已爲盆盎也。與其未離于地也。無以異其已成器而破碎漫漶而復歸其故也。與其爲盎亦無以異矣。夫臨江之鄉。居人汲水以浸其園。江水弗憎也。苦洿之家。決洿而注之江。洿水弗樂也。是故其在江也。無以異其浸園也。其在洿也。亦無以異其在江也。是故聖人因時以安其位。當世而

樂其業。夫悲樂者德之邪也。而喜怒者道之過也。好憎者心之暴也。故曰其生也天行其死也物化。靜則與陰俱閉。動則與陽俱開。精神澹然無極。不與物散。而天下自服。故心者形之主也。而神者心之寶也。形勞而不休則蹶。精用而不已則竭。是故聖人貴而尊之。不敢越也。夫有夏后氏之璜者。匣貴而藏之。寶之至也。夫精神之可寶也。非直夏后氏之璜也。禹南省方。濟于江。黃龍負舟。舟中之人五色無主。禹乃熙笑而稱曰。我受命于天。竭力而勞。萬民生寄也。死歸也。何足以滑和視。龍猶蜺蜺。顏色不變。龍乃弭耳掉尾。

而逃禹之覲物亦細矣。鄭之神巫相壺子林見其徵
告列子。列子行泣報壺子。壺子持以天壤名實不入
機發于踵。壺子之視死生亦齊矣。子求行年五十有
四而病偃。僂脊管高于頂。膈下迫頤。兩脾在上。燭營
指天。匍匐自闕于井。曰偉哉造化者。其以我爲此拘
拘耶。此其視變化亦同矣。晏子與崔杼盟。臨死地而
不易其義。殖華將戰而死。莒君厚賂而止之。不改其
行。故晏子可迫以仁而不可劫以兵。殖華可止以義
而不可縣以利。君子義死而不可以富貴留也。義爲
而不可以死亡恐也。彼則直爲義耳。而尙猶不拘于

物又况無爲者矣。堯不以有天下爲貴，故授舜。公子
札不以有國爲尊，故讓位。子罕不以玉爲富，故不受
寶。務光不以生害義，故自投于淵。由此觀之，至貴不
待爵，至富不待財，天下至大矣，而以與佗人。身至親
矣，而棄之淵外。此其餘無足利矣。此之謂無累之人。
無累之人，不以天下爲貴矣。上觀至人之論，深原道
德之意，以下考世俗之行，乃足羞也。故通許由之義，
金縢豹韜廢矣。延陵季子不受吳國，而訟閒田者慙
矣。子罕不利寶玉，而爭券契者媿矣。務光不汚于世，
而貪利偷生者閔矣。故不觀大義者，不知生之不足

貪也不聞大言者不知天下之不足利也。今夫窮鄙之社也，叩盆叩瓠，相和而歌，自以爲樂矣。嘗試爲之擊建鼓，撞巨鐘，乃性仍仍然，知其盆瓠之足羞也。藏詩書，修文學，而不知至論之旨，則拊盆叩瓠之徒也。夫以天下爲者，學之建鼓矣。尊勢厚利，人之所貪也，使之左據天下圖，而右手刎其喉，愚夫不爲。由此觀之，生尊于天下也。聖人食足以接氣，衣足以蓋形，適情不求餘，無天下不虧其性，有天下不羨其和，有天下無天一實也。今贛人敖倉，予人河水，饑而餐之，渴而飲之，其入腹者不過簞食瓢漿，則身飽而敖倉

不爲之減也。腹滿而河水不爲之竭也。有之不加飽。無之不爲之饑。與守其筭筭有其井一實也。人大怒破陰大喜墜陽大憂內崩大怖生狂除穢去累莫若未始出其宗乃爲大通清目而不以視靜耳而不以聽鉗口而不以言委心而不以慮棄聰明而反大素休精神而棄知故覺而若昧以生而若死終則反本未生之時而與化爲一體死之與生一體也。今夫繇者揭鑊甬負籠土鹽汗交流喘息薄喉當此之時得株越下則脫然而喜矣。巖穴之間非直越下之休也。病疵瘕者捧心抑腹膝上叩頭蹠踟而諦通夕不寐。

當此之時，噲然得臥，則親戚兄弟歡然而喜。夫修夜之寧，非直一噲之樂也。夫使天下畏刑而不敢盜，豈若能使無有盜心哉？越人得鱉蛇以爲上肴，中國得而棄之，無用，故知其無所用。貪者能辭之，不知其無所用。廉者不能讓也。夫人主之所以殘亡其國家，損棄其社稷，身死于人手，爲天下笑，未嘗非爲非欲也。夫仇由貪大鍾之賂而亡其國，虞君利垂棘之璧而擒其身，獻公豔驪姬之美而亂四世，桓公甘易牙之和而不以時葬，胡王淫女樂之娛而亡上地，使此五君者適情辭餘以已爲度，不隨物而動，豈有此大患？

哉、故射者非矢不中也。學射者不治矢也。御者非轡不行。學御者不爲轡也。知冬日之箠、夏日之裘、無用于已、則萬物之變爲塵埃矣。故以湯止沸、沸乃不止。誠知其本、則去火而已矣。

劉安精神訓

夫服藥求汗、或有弗獲而愧情一集、渙然流離、終朝未餐、則囂然思食、而曾子銜哀七日不饑、夜分而坐、則低迷思寢、內懷殷憂、則達旦不瞑、頸刷理鬢、醇醴發顏、僅乃得之。壯士之怒、赫然殊觀、植髮衝冠。由此言之、精神之于形體、猶國之有君也。神躁于中、而形喪于外、猶君昏于上、國亂于下也。夫爲稼于湯世、編

有一溉之功者、雖中歸于焦爛、必一溉者後枯、然則一溉之益、固不可誣也。而世常謂一怒不足以侵性、一哀不足以傷身、輕而肆之、是猶不識一溉之益、而望嘉穀于旱苗者也。是以君子知形恃神以立、神須形以存、悟生理之易失、知一過之害生、故修性以保神、安心以全身、愛憎不棲于情、憂喜不留于意、泊然無感、而體氣和平、又呼吸吐納、腹食養身、使形神相親、表裏俱濟也。是猶栢侯抱將死之疾、而怒扁鵲之先見、以覺痛之日、而爲受病之始也。害成于微、而救之于著、故有無功之理。馳騁常人之域、故有一切之

壽仰觀俯察莫不皆然以多自證以同自慰謂天地之理盡此而已矣稽康養生論

達生

惠子謂莊子曰吾有大樹人謂之樗其大本擁腫而不中繩其小枝卷曲而不中規矩立之塗匠者不顧今子之言大而無用衆所同去也莊子曰子獨不見狸狌乎卑身而伏以候敖者東西跳梁不避高下中于機辟死于罔罟今夫殽牛其大若垂天之雲此能爲大矣而不能執鼠今子有大樹患其無用何不樹之于無何有之鄉廣莫之野彷徨乎無爲其側道逢

乎寢臥其下、不天斤斧、物無害者、無所可用、安所困苦哉、

莊周逍遙遊

張評事至止辱所惠詩及書把玩無厭、暫知有叙、上言離恨下勗交情、篤以猛風乾、蘇之談弘、以驟雨濕、新之喻雖聞義則死、道存于起予、而擬人則失事、均乎玩物、借如誠說、蓋足下之不知言、倘或劇談、豈吾人之仰望矣、夫鯉之爲魚也、潜碧海、泳滄流、沉鰓于渤解之中、掉尾乎風濤之下、而濠魚并鮒、自以爲可得而齊焉、鵬之爲鳥也、刷毛羽、恣飲啄、戢翼于天地之間、宛頸乎江海之畔、而雙鳬、隻鴈、自以爲可得而

襲焉及其化羽垂天搏風九萬振鬣橫海擊水三千
寧假力于槍榆在藻資汀滯涓流之水俟窟堞揚塵
之風哉故張子房之達人也擊水搏風之適焉朱買
臣之屈已也戢翼沉鰓之致焉足下雅得古人之致
不乏先賢之適自守莊筌無嬰魏網亦寧不知在藻
槍榆之力非擊水搏風之助哉而詞旨勤勤深所未
諭盍言爾志豈若是乎夫人生百年物理千變名利
寵辱之情立矣愛憎毀譽之迹生焉其道在則尊德
成而上幽貞爲虛白之室靜默爲太玄之門知軒冕
是倘來之物悟榮貴非作力所致苟斯道不墜亦何

患無成而圖僥倖于權重之交養聲利于衆多之口
斯所以楊朱徘徊于岐路阮籍怵惕于窮途嗟乎露
往霜來歲華不待山高河廣離意無時桂樹寒花公
子去而忘返松巖春草王孫遊以不歸去矣員生遠
離隔矣音塵不嗣情甚勞矣畏容藏谷靜深殊矣惠
而好我無密爾音

駱賓王答員半千書

老莊

惠子爲惠王爲國法已成而示諸先生先生皆善之
奏之惠王惠王甚說之以示翟煎曰善惠王曰善可
行乎翟煎曰不可惠王曰善而不可行何也翟煎對

曰今夫舉大木者前呼邪許後以應之此舉重勸力之歌也。豈無鄭衛激楚之音哉。然而不用者不若此其宜也。治國有禮不在文辯。故老子曰法令滋彰盜賊多有此之謂也。田駢以道術說齊王王應之曰寡人所有齊國也道術難以除患願聞國之政。田駢對曰臣之言無政而可以爲政譬之若林木無材而可以爲材願王察其所謂而自取齊國之政焉。已雖無除其患害天地之間六合之內可陶冶而變化也齊國之政何足問哉。此老聃之所謂無狀之狀無物之象者也。若王之所問者齊也田駢所稱者材也材不

及林林不及雨雨不及陰陽多陰陽不及和和不及道
白公勝得荆國不能以府庫分人七日石乙入曰不
義得之又不能布施患必至矣不能予人不若焚之
毋令人害我白公弗聽也九日葉公入乃發大府之
貨以予衆出高庫之兵以賦民因而攻之十有九日
而擒白公夫國非其有也而欲有之可謂至貪也不
能爲人又無以自爲可謂至愚矣譬白公之嗇也何
以異于梟之愛其子也故老子曰持而盈之不如其
已揣而銳之不可長保也趙簡子以襄子爲後董闕
子曰無卹賤今以爲後何也簡子曰是爲人也能爲

社稷忍羞異日知伯與襄子飲而批襄子之首大夫
請殺之襄子曰先君之立我也曰能爲社稷忍羞豈
曰能刺人哉處十月知伯圍襄子于晉陽襄子疏隊
而擊之大敗知伯破其首以爲飲器大王亶父居邠
翟人攻之事之以皮帛珠玉而弗受曰翟人之所求
者地無以財物爲也大王亶父曰與人之兄居而殺
其弟與人之父處而殺其子吾弗爲皆勉處矣爲吾
臣與翟人奚以異且吾聞之也不以其所養害其養
杖策而去民相連而從之遂成國于岐山之下大王
亶父可爲能保生矣雖富貴不以養傷身雖貧賤不

以利累形。今受其先人之爵祿。則必重失之。所自來者久矣。而輕失之。豈不惑哉。中山公子牟謂詹子曰。身處江海之上。心在魏闕之下。爲之奈何。詹子曰。重生。重生則輕利。中山公子牟曰。雖知之。猶不能自勝。詹子曰。不能自勝。則從之。從之神無怨乎。不能自勝。而強弗從者。此之謂重傷。重傷之人。無壽類矣。王壽負書而行。見徐馮于周。徐馮曰。事者應變而動。變生于時。故知時者無常行。書者言之所出也。言出于知者。知者藏書。于是王壽乃焚香而舞之。趙簡子死。未葬。中年入齊。已葬五日。襄子起兵攻圍之。未合而城

自壞者十丈襄子擊金而退之軍吏諫曰君誅中牟之罪而城自壞是天助我何故去之襄子曰吾聞之叔向曰君子不乘人于利不迫人于險使之治城城治而後攻之中牟聞其義乃請降故老子曰夫唯不爭故天下莫能與之爭秦繆公請伯樂曰子之年長矣子姓有可使求馬者乎對曰良馬者可以形容筋骨相也相天下之馬者若滅若失若亡其一若此馬者絕塵弭轍臣之子皆下材也可告以良馬而不可告以天下之馬臣有所與供僮糴采薪者九方堙此其于馬非臣之下也請見之穆公見之使之求馬三

月而反報曰已得馬矣在于沙丘穆公曰何馬也對曰牡而黃使人往取之牝而驪穆公不說召伯樂而問之曰敗矣予之所使求者毛物牝牡弗能知又何馬之能知伯樂喟然大息曰一至此乎是乃其所以千萬至而無數者也若堙之所觀者天機也得其精而忘其粗在內而忘其外見其所見而不見其所不見視其所視而遺其所不視若彼之所相者乃有貴乎馬者馬至而果千里之馬故老子曰大直若屈大巧若拙吳起爲楚令尹適魏問屈宜若曰王不知起之不肖而以爲令尹先生試觀起之爲人也屈子曰

將奈何吳起曰將衰楚國之爵而平其制祿損其有
餘而綏其不足砥礪甲兵時爭利于天下屈子曰宜
若聞之昔善治國家者不變其故不易其常今子將
衰楚國之爵而平其制祿損其有餘而綏其不足是
變其故易其常也行。之者不利。宜若聞之曰怒者逆
德也。兵者凶器也。爭者人之所本也。今子陰謀逆德。
好用凶器。始人之所本逆之至也。且子用魯兵不宜
得志于齊而得志焉。子用魏兵不宜得志于秦而得
志焉。宜若聞之。非禍人不能成禍。吾固惑吾王之數
逆天道。戾人理。至今無禍。差須夫子也。吳起惕然曰。

尚可更乎、屈子曰成形之徒不可更也、子不若敦愛而篤行之、老子曰挫其銳解其紛和其光同其塵、晉伐楚三舍不止、大夫請擊之、莊王曰先君之時晉不伐楚及孤之身而晉伐楚是孤之過也、若何其辱、群大夫曰先臣之時晉不伐楚、今臣之身而晉伐楚此臣之罪也、請三擊之、王俛而泣涕沾襟起而拜、群大夫晉人聞之曰君臣爭以過爲在己且輕下其臣不可伐也、夜還師而歸、老子曰能受國之垢是謂社稷主、宋景公之時熒惑在心、公懼召子韋而問焉、曰熒惑在心何也、子韋曰熒惑天罰也、心宋分野禍且當

君雖然可移于宰相公曰宰相可使治國家也而移死焉不祥子韋曰可移于民公曰民死寡人誰爲君乎寧獨死耳子韋曰可移于歲公曰歲民之命歲饑民必死矣爲人君而欲殺其民以自活也其誰以我爲君者乎是寡人之命固已盡矣子韋無復言矣子韋還走北面再拜曰敢賀君天之處高而聽卑君有君人之言三天必有三賞君今夕星必徙三舍君延年二十一歲公曰子奚以知之對曰君有君人之言三故有三賞星必三徙舍舍行七里三七二十一故君移年二十一歲臣請伏于陛下以伺之星不徙臣

請死之。公曰：「可是夕也。」星果三徙舍。故老子曰：「能受國之不祥，是謂天下王。」昔者公孫龍在趙之時，謂弟子曰：「人而無能者，龍不能與遊；有客衣褐帶索而見曰：『臣能呼公孫龍。』」顧謂弟子曰：「門下故有能呼者乎？」對曰：「無有。」公孫龍曰：「與之弟子之籍，後數日往說燕王。」至于河上而航，在一汜，使善呼之一呼而航來，故曰：「聖人之處世，不逆有伎能之士。」故老子曰：「人無棄人，物無棄物。」是謂襲明。子發攻蔡，踰之，宣王郊迎，列田百頃而封之。執圭子發辭不受，曰：「治國立政，諸侯入賓，此君之德也。」發號施令，師未合而敵遁，此將軍

之威也。兵陳戰而勝敵者，此庶民之力也。夫乘民之
功、勞、而、取、其、爵、祿、者、非、仁、義、之、道、也。故辭而弗受。故
老子曰：功成而不居，夫惟不居，是以不去。大司馬捶
鉤者，年八十矣，而不失鉤芒。大司馬曰：子巧邪？有道
邪？曰：臣有守也。臣年二十，好捶鉤于物，無視也，非鉤
無察也。是以用之者，必假于弗用也，而以長得其用。
而况持無不用者乎？物孰不濟焉？故老子曰：從事于
道者，同于道。季子治亶父三年，而巫馬期絕衣短褐。
易容貌，往觀化焉。見得魚，釋之。巫馬期問曰：凡子所
爲魚者，欲得也。今得而釋之，何也？漁者對曰：季子不

欲人取小魚也。所得者小魚，是以釋之。巫馬期歸以報孔子曰：季子之德至矣！使人聞行，若有嚴行在其側者。季子何以至于此？孔子曰：丘嘗問之以治言曰：誠于此者，刑于彼。季子必行此術也。故老子曰：去彼取此，精神通于死生，則物孰能惑之？荆有伋，非得寶劍于干隊，還反度江，至于中流，陽侯之波兩蛟夾繞其船，伋非謂柁船者曰：嘗有如此而得活者乎？對曰：未嘗見也。于是伋非瞑目，敎然攘臂拔劍曰：武士可以仁義之禮說也，不可劫而奪也！此江中之腐肉朽骨，棄劍而已。余有笑愛焉。赴江刺蛟，遂斷其頭。船中

先富貴之
腐肉也
笑官制

人盡活風波畢除荆爵爲執圭孔子聞之曰夫善載
腐肉朽骨棄劍者欣非之謂乎魏文侯觴諸大夫于
曲陽飲酒酣文侯喟然歎曰吾獨無豫讓以爲臣子
蹇重舉白而進之曰請浮君君曰何也對曰臣聞之
有命之父母不知孝子有道之君不知忠臣夫豫讓
之君亦何如哉文侯受觴而飲酣不獻曰無管仲鮑
叔以爲臣故有豫讓之功故老子曰國家昏亂有忠
臣漢劉安道應訓

夫莊子者可謂知本矣故未始藏其狂言言雖無會
而獨應者也夫應而非會則雖當無用言非物事則

雖高不行與夫寂然不動不得已而後起者固可間
矣斯可謂之無心者也夫心無爲則隨感而應應隨
其時言唯謹爾故與化爲體流萬代而宜物豈曾設
對獨邁而遊談乎方外哉此其所以不經而爲百家
之冠也然莊生雖未體之言則至矣通天地之統序
萬物之性達死生之變而明內聖外王之道上知造
物無物下知有物之自造也其言宏綽其旨玄妙至
至之道融微旨雅泰然遺放放而不敖故曰不知義
之所適猖狂妄行而蹈其大方含哺而熙乎澹泊鼓
腹而游乎混芒至人極乎無親孝慈終于兼忘禮樂

復乎已能忠信發乎天光用其先則其朴自成是以
神器獨化于玄冥之境而源流深長也故其長波之
所蕩高風之所扇暢乎物宜適乎民願弘其鄙解其
懸灑落之功未加而矜夸所以散故觀其書超然自
以爲已當經崑崙涉太虛而游惚恍之庭矣雖復貪
婪之人躁進之士暫而攬其餘芳味其溢流彷彿其
音影猶足曠然有忘形自得之懷况探其遠情而玩
永年者乎遂綿邈清遐去離塵埃而返冥極者也

郭

象莊
子序

是以廣成子處崆峒之山以入無窮之門軒轅登崑

崙之阜而遺玄珠之根此則潛身者易以爲活而離
本者難與永存也馮夷不遇海若則不以已爲小雲
將不失于其鴻濛則無以知其少由斯言之自是者
不章自建者不立守其有者有據持其無者無執月
弦則滿日朝則襲咸池不留陽谷之上而懸車之後
將人也故求得者喪爭明者失無欲者自足空虛者
受實夫山靜而谷深者自然之道也得之道而正者
君子之實也

防籍莊論

八編類纂卷之一百二十七

經濟編

人類

方術

景純篤志綿細洽聞彊記在異書而畢綜瞻往滯而
咸釋情源秀逸思業高奇襲文雅於西朝振辭鋒於
南夏爲中興才學之宗矣夫語怪徵神伎成則賤前
修貽訓鄙乎茲道景純之探策定數考往知來邁京
管於前圖軼梓寵於遐篆而官微于世禮薄于時區
區然寄客傲以申懷斯亦伎成之累也若乃大塊流

形玄天賦命吉凶修短定乎自然雖稽象或通而厭
勝難恃稟之有在必也無差自可居常待終頽心委
適何至銜刀被髮遑遑於幽穢之間哉晚抗忠言無
救王敦之逆初慙智免竟斃山宗之謀仲尼所謂攻
乎異端斯害也已悲夫稚川東髮從師老而忘倦納
奇冊府總百代之遺篇紀化仙都窮九丹之秘術謝
浮榮而捐雜藝賤尺寶而貴分陰游德棲真超然事
外全生之道其最優乎

晉書郭璞
葛洪傳論

梁昭明太子葬其母丁貴嬪遣人求墓地之吉者或
與鹽者俞三副求賣地三副密啓上言太子所得地

不如今地於上爲吉武帝年老多忌卽命市之葬畢
有道士云此地不利長子若厭之或可申延乃爲蠟
鵝及諸物埋於墓側長子位宮監鮑邈之魏雅初嘗
有寵於太子邈之晚見疎於雅乃密啓上云雅爲太
子厭禱武帝遣檢掘果得鵝物太驚將窮其事徐勉
固諫而止但誅道士由是太子終身慙憤不能自明
司馬光曰昭明太子之仁孝武帝之慈愛一染嫌疑
之迹身以憂歿罪及後昆求吉得凶不可前滌是以
詭誕之士奇邪之術君子遠之

唐太宗以近世陰陽雜書訛僞尤多命太常博士呂

才與諸術士刊定可行者凡四十七卷書成上之才
皆爲之叙質以經史其序宅經以爲近世巫覡妄分
五姓如張王爲商武庚爲羽似取諧韻至於以柳爲
官以趙爲角又復不類或同出一姓分屬宮商或復
姓數字莫辨徵羽此則事不稽古義理乖僻者也叙
祿命以爲祿命之書多言或中人乃信之然長平坑
卒未聞共犯三刑南陽貴士何必俱當六合今亦有
同年同祿而貴賤懸殊共命共胎而夭壽更異按魯
莊公法應貧賤又尪弱短陋惟得長壽秦始皇法無
官爵縱得祿少奴婢爲人無始有終漢武帝後魏孝

文帝皆法無官爵宋武帝祿與命並當空亡唯宜長子雖有次子法當早夭此皆祿命不驗之著明者也其叙葬以爲孝經云卜其宅兆而安厝之蓋以窆窆既終永安體魄而朝市遷變泉石交侵不可前知故謀之龜筮近代或遺年月或相墓田以爲一事失所禍及死生按禮天子諸侯大夫葬皆有月數是古人不按年月也春秋九月丁巳葬定公而不可葬戊午日下昃乃克葬是不擇日也鄭葬簡公司墓之室當路毀之則朝而窆不毀則日中而窆子產不毀是不擇時也古之葬者皆於國都之北兆域有常處是不

擇地也。今葬書以爲子孫富貴貧賤壽夭皆因卜葬所致。天子文爲令尹而三已。柳下惠爲士師而三黜。計其丘隴未嘗改移。而野俗無識。妖巫妄言。遂於擗踊之際。擇葬地而希官爵。荼毒之秋。選葬時而規財利。或云辰日不可哭泣。遂荒爾而對弔客。或云同塋忌於臨壙。遂吉服不送其親。傷教敗禮。莫斯爲甚。術士皆惡而言。而識者以爲確論。

王玄策之破天竺也得方士那羅邇娑婆寐以歸自言有長生之術。太宗頗信之。深加禮敬。令長生藥發使四方求奇藥異石。又發使詣婆羅門諸國采藥。其

言率皆迂誕無實苟欲以延歲月藥竟不就乃放還
高宗卽位復詣長安又遣歸玄策時爲道王友奏言
此婆羅門實能合長年藥自說必成今遣歸可惜失
之玄策退高宗謂侍臣曰自古安有神仙秦始皇漢
武帝求之疲弊生民卒無所成果有不死之人今皆
安在李勣對曰誠如聖言此婆羅門今茲再來容髮
衰白已改於前何能生長陛下遣之內外皆喜婆婆
寐竟歿於長安

烏荼國婆羅門盧迦逸多自言能合不死藥高宗將
餌之東臺侍郎郝處俊諫曰修短有命非藥可延身

觀之末先帝服那羅邏娑婆寐藥竟無效大漸之際
名醫不知所爲議者歸罪娑婆寐將加顯戮恐取笑
戎狄而止前鑒不遠願陛下深察高宗乃止

憲宗與宰相語及神僊問果有之乎李藩對曰秦始
皇漢武帝學仙之效具載前史太宗服天竺僧長年
藥致疾此古今之明戒也陛下春秋鼎盛方勵志太
平宜拒絕方士之說苟道盛德充人安國理何憂無
堯舜之壽乎

柳泌至台州驅吏民采藥歲餘無所得而懼舉家逃
入山中浙東觀察使捕送京師皇甫鏐李道古保護

之憲宗復使待詔翰林服其藥日加躁渴起居舍人
裴潏上言以爲除天下之害者受天下之利同天下
之樂者饗天下之福自黃帝作至文武享國壽者皆
用此道也自去歲以來所在多薦方士轉相汲引其
數浸繁借令天下果有神僊彼必深潛巖壑惟畏人
知凡伺候權貴之門以大言自衒奇伎驚衆者皆不
軌徇利之人豈可信其說而餌其藥耶夫藥以愈疾
非朝夕常餌之物况金石酷烈有毒又益以火氣殆
非人五臟所能勝也古者君飲藥臣先嘗之乞令獻
藥者先自餌一年則真僞自可辨矣上怒貶潏爲江

陵令

穆宗餌金石之藥處士張臯上疏曰神慮澹則血氣和嗜慾勝則疾疹作藥以攻疾無疾不可餌也昔孫思邈有言藥勢有所偏助令人藏氣不平借使有疾用藥猶須重慎况無疾乎庶人尚爾况天子乎先帝信方士妄言餌藥致疾此陛下所詳知也豈得復循其覆轍乎上善其言而求之不已

高駢好神僊有方士呂用之坐妖黨亡命歸駢駢厚待之補以軍職又引其黨張守一諸葛殷共蠱惑駢駢與鄭畋有隙用之謂駢曰宰相有遣劔客來刺公

者、今夕至矣、駢大懼、問計安出、用之曰、張先生嘗學斯術、可以禦之、駢請於守、一守一許諾、乃使駢衣婦人之服、潛於他室、而守一代居駢寢榻中、夜擲銅器於階、令鏗然有聲、又密以囊盛彘血灑於庭宇、如格鬪之狀、及旦、笑謂駢曰、幾落奴手、駢泣謝曰、先生於駢、乃更生之惠也、厚酬以金寶、有蕭勝者、賂用之、求鹽城監、駢有難色、用之曰、近得上僊書云、有寶劍在鹽城井中、須一靈官取之、以勝上僊、左右之人欲使取劍耳、駢乃許之、勝至鹽數月、函一銅匕首以獻、用之見稽首曰、此北帝所佩、得之、則百里之內、五兵不

能犯駢乃飾以珠玉常置坐隅用之又刻青石爲奇字云玉皇授白雲先生高駢密令左右置道院香案駢得之驚喜用之曰玉皇以公焚修功著將補真官計鸞鶴不日當降此際用之等謫限亦滿必得陪幢節同歸上清耳是後駢於道院庭中刻木鶴時著羽服跨之日夕齋醮鍊金燒丹費以巨萬計用之又言神僊好樓居說駢作迎僊樓費十五萬緡又作延和閣高八丈用之每對駢呵叱風雨仰揖空際云有神僊過雲表駢輒隨而拜之駢倚用之如左右手公私大小之事皆決於用之選賢進不肖淫刑濫賞駢之

政事於是大壞矣。用之知上下怨憤，恐有竊發，請置巡察使，駢卽以用之。領之募險獍者百餘人，縱橫閭巷間，謂之察子。民間呵妻詈子，靡不知之用之。欲奪人貲財，掠人婦女，輒誣以叛逆，榜掠取服，殺其人而取之。所破滅者數百家。道路以目。將吏士民雖家居，皆重足屏氣用之。又欲以兵威脅制諸將，請選募諸軍驍勇之士二萬人，號左右莫邪都駢。卽以張守一及用之爲左右莫邪軍，使每出入導從，近千人用之。侍妾百餘人，自奉奢靡，用度不足，輒留三司綱輸其家用之。猶慮人泄其奸謀，乃言於駢曰：「神僊不難致，

但恨學道者不能絕俗累故不肯降臨耳駢乃悉去姬妾謝絕人事賓客將吏皆不得見有不得已見之者皆先令沐浴齋戒然後見拜起纔畢已復引出由是用之專行威福無所忌憚境內不復知有駢矣南唐主嘗夢吞靈丹丹而方士史守沖獻丹方以爲神而餌之浸成躁急左右諫不聽嘗以藥賜李建勳曰臣餌之數日已覺躁熱況多餌乎唐主曰朕服之久矣群臣奏事往往暴怒唐主問道士王栖霞何道可致太平對曰王者治心治身乃治家國今陛下尚未能去饑。嘆。飽。喜。何。論。太平宋后自簾中稱歎以爲

至言凡唐主所賜予、栖霞皆不受、栖霞常爲人奏章、唐主欲爲之築壇、辭曰、國用方乏、何暇及此、俟焚章不化、乃當奏請耳、

宋徽宗時濮人王老志初爲小吏、遇異人、受以丹、遂棄妻子、結草廬、田間爲人言休咎、多驗、太僕卿王直以名聞、時帝方嚮道術、乃召至京師、館於蔡京第、嘗緘書一封至帝所、啓視、乃昔歲秋中與喬劉二妃燕好之語也、由是益信之、號爲洞微先生、朝士多從求書、初若不可解者、卒應者什八九、其門如市、京慮太甚、頗以爲戒、老志亦謹畏、乃奏禁絕之、踰年、死、

洪州人王仔昔初隱于嵩山自言遇許遜得大洞隱書豁落七元之法能道人未來事京薦之帝召見賜號冲隱處士篆符有驗進封通妙先生由是道家之事日興而仔昔恩寵寔加朝臣戚里夤緣關通中丞王安中上疏請自今招延山林道術之士當責所屬保任宣召出入必令察視其所經由仍申嚴臣庶往還之禁并言蔡京欺君僭上蠹國害民數事帝欣然納之已而再疏京罪帝曰本欲卽行卿章以近天寧節俟過此當爲卿罷京京伺知之大懼其子攸日久待禁中泣拜懇祈帝爲遷安中翰林學士

元順帝時西番僧教帝行房中運氣之術號演蝶兒法又進僧伽璘真善秘密法帝皆習之詔以西番僧爲司徒伽璘真爲大元國師各取良家女三四人奉之謂之供養嘗謂帝曰陛下尊居萬乘富有四海不過保有見世而已人生能幾何當受此秘密大喜樂禪定於是帝日從事於其法廣取女子惟淫戲是樂帝諸弟八郎者與哈麻妹壻秃魯帖木兒及老的沙等十人號倚納皆有寵在帝前相與褻狎甚至男女裸處號所處室曰些卽兀該猶率言事事無碍也君臣宣淫而群僧出入禁中無所禁止醜穢外聞皇太

八編卷之三
子既長深疾二僧等所爲欲去之未能也

圖緯

元文宗時司徒香山言陶弘景胡笳曲有負展飛天曆終是甲辰君之語暗合陛下生年紀號實受命之符乞錄付史館頒示中外詔翰林集賢諸儒臣議咸以謂唐開元間薛讓進武后鼎銘云上天降監方建隆基爲弘宗受命之符姚崇表賀宋司馬光言其采偶就之文以爲符端此小臣之諂而宰相實之是侮其君也今弘景之曲雖於生年紀號若偶合者然陛下應天順人紹隆正統無待於旁引曲說以爲符命

從其所言、恐啓識緯之端、非所以定民志也、事遂寢。

禍福

吳人入荆、召陳懷公。懷公召國人曰：「欲與荆者左，欲與吳者右。」逢滑當公而進，曰：「吳未有禍，荆未有禍，公曰：『國勝君出，非禍而奚？』對曰：『小國有是，猶復而況大國乎？楚雖無德，亦不斬艾其民。吳日弊兵，暴骨如莽，未見德焉。天其或者正訓荆也。禍之適吳，何日之有？』陳侯從之。」

唐王涯有再從弟沐家於家南，老且貧，聞涯爲相，跨驢詣之，欲求一簿尉，留長安二歲餘始得一見涯，待

之殊落莫久之沐因嬖奴以道所欲涯許以微官自是旦夕造涯之門以俟命及涯家被收跡適在其第與涯俱腰斬舒元輿有族子守謙愿而敏元輿愛之從元輿者十年一旦忽以非罪怒之日加遣責奴婢輩亦薄之守謙不自安求歸江南元輿亦不畱守謙悲歎而去夕至昭應聞元輿收族守謙獨免

咎徵

大王使劉定公勞趙孟於潁館於雒汭劉子曰美哉禹功明德遠矣微禹吾其魚乎吾與子弁冕端委以治民臨諸侯禹之力也子盍亦遠績禹功而大庇民

乎。對曰：「老夫罪戾是懼，焉能恤遠？吾儕偷食，朝不謀夕，何其長也！」劉子歸以語王曰：「諺所謂老將至而耄及之者，其趙孟之謂乎？爲晉正卿，以主諸侯，而儕於隸人，朝不謀夕，棄神人矣。神怒民叛，何以能久？趙孟不復年矣。神怒不歆其祀，民叛不卽其事，祀事不從，又何以年？」

后子見趙孟，趙孟曰：「吾子其曷歸？」對曰：「鍼懼選於寡君，是以在此，將待嗣君。」趙孟曰：「秦君何如？」對曰：「無道。」趙孟曰：「亡乎？」對曰：「何爲一世無道國？」未艾也。國於天地，有與立焉，不數世淫弗能斃也。」趙孟曰：「天乎？」對曰：

有焉趙孟曰其幾何對曰鍼聞之國無道而年穀和
熟天贊之也鮮不五稔趙孟視蔭曰朝夕不相及誰
能待五后子出而告人曰趙孟將死矣主民翫歲而
惕日其與幾何

魯哀公問于孔子曰寡人聞之東益宅不祥信有之
乎孔子曰不祥有五而東益不與焉夫損人而益己
身之不祥也棄老取幼家之不祥也釋賢用不肖國
之不祥也老者不教幼者不學俗之不祥也聖人伏
匿天下之不祥也故不祥有五而東益不與焉詩曰
各敬爾儀天命不又未聞東益之與爲命也

邾隱公來朝。子貢觀焉。邾子執玉高，其容仰。公受玉卑，其容俯。子貢曰：「以禮觀之，二君者皆有心於亡焉。夫禮，處生存亡之體也。將左右周旋進退，俯仰於是乎，取之朝祀喪戎，於是乎。觀之，今正月以相朝而皆不度心，已亡矣。嘉事不體，何以能久？高仰，驕也；卑俯，替也。驕近亂，替近疾。君爲主，其先亡乎？」夏五月壬申，公薨。仲尼曰：「賜不幸言而中，是使賜多言者也。」

晉平公出畋，見乳虎伏而不動。顧謂師曠曰：「吾聞之也，伯王之主出，則猛獸伏不敢起。今者寡人出，見乳虎伏而不動，此其猛獸乎？」師曠曰：「鵠食鴛鴦，食駿驥。」

嗟乎世人
犯此者多
而平公獨
當其咎

駮駮食豹豹食駮駮食虎夫駮之狀有似駮馬今者
君之出必駮駮馬而出畋乎公曰然師曠曰臣聞之
一自誣者窮再自誣者辱三自誣者死今夫虎所以
不動者爲駮馬也固非主君之德義也君柰何一自
誣乎平公異日出朝有鳥環平公不去平公顧謂師
曠曰吾聞之也伯王之主鳳下之今者出朝有鳥環
寡人終朝不去是其鳳鳥乎師曠曰東方有鳥名諫
阿其爲鳥也文身而朱足憎鳥而愛狐今者吾今必
衣狐裘以出朝乎平公曰然師曠曰臣已嘗言之矣
一自誣者窮再自誣者辱三自誣者死今鳥爲狐裘

之故非吾君之德義也。君柰何而再自誣乎？平公不
說，異日置酒虎祁之臺，使郎中馬章布蒺藜于階上。
令人召師曠，師曠至，履而上堂。平公曰：「安在人？」
履而上。人主堂者，乎？師曠解履刺足，伏刺膝，仰天而嘆。
公引起之，曰：「今者與叟戲，叟遽憂乎？」對曰：「憂夫肉自
生蟲，而還自失也。木自生蠹，而還自刻也。人自興妖，
而還自賊也。五鼎之具，不當生藜藿；人主堂廟，不當
生蒺藜。」平公曰：「今爲之柰何？」師曠曰：「妖已在前，無可
柰何。」入來月八日，修百官立太子。君將歿矣，至來月
八日，平公謂師曠曰：「叟以今日爲期，寡人如何？」師曠

不樂謁歸歸未幾而平公歿乃知師曠神明矣

鬼神

宰我問於孔子曰吾聞鬼神之名而不知其所謂敢問焉孔子曰人生有氣有魂有魄氣魂魄會謂之生氣也者神之盛也魄也者鬼之盛也生必有死形魄歸於地謂之鬼魂氣歸于天謂之神合鬼與神而享之教之至也是故築爲宮室設爲宗祧春秋祭祀以別親疏遠邇教民反故復始不敢忘其所由生也尊其生必致其敬古聖之道仁人之德教也昔者文王之祭也事歿如事生思歿者而不欲生忌日則必哀

稱諱則如見親祀之忠也。如見親之所愛如欲色然。詩云明發不寐有懷二人。文王之詩也。敬而致之又從而思之。祭之日樂與哀半。致之必樂已至必哀孝子之情也。文王爲能得之矣。

周惠王時有神降於莘。王問於內史過曰。是何故有之乎。對曰。有之國將興。其君齋明中正。精潔惠和。其德足以昭其馨香。其惠足以同其民人。神饗而民聽。民神無怨。故明神降焉。觀其政德而均有福焉。國將亡。其君貪冒淫僻。邪佚荒怠。蕪穢暴虐。其政腥臊。馨香不登。其刑矯誣。百姓攜貳。明神不蠲而民有遠意。

民神痛怨無所依懷故神亦往焉觀其苛慝而降之禍是以或見神而興亦有以亡昔夏之興也祝融降于崇山其亡也回祿信于亭隧商之興也檇杙次于丕山其亡也夷羊在牧周之興也鸛鷥鳴于岐山其衰也杜伯射宣王於鎬是皆明神之紀者也王曰今是何神也對曰昔昭王娶于房曰房后是有爽德協于丹朱丹朱馮身以儀之生穆王焉是監燭周之子孫而禍福之夫一神不遠徙遷若由是觀之其丹朱耶王曰其誰受之對曰在虢王曰然則何爲對曰臣聞之道而得神是謂豐福淫而得神是謂貪禍今虢

少荒其亡也。王曰：吾其柰何？對曰：彼太宰以祝史率
狸姓奉犧牲，淦盛玉帛往獻焉，無有所也。王曰：虢其
幾何？對曰：昔堯臨民以五，今其胄見鬼神之見也不
失其物，若由是觀之，不過五年。王使太宰已父率傅
氏及祝奉犧牲，玉觴往獻焉。內史過從至虢，虢公亦
使祝史請土焉。內史過歸，告王曰：虢必亡矣，不禋于
神而求福焉，神必禍之；不親于民而求用焉，民必違
之。精意以享，禋也；慈保庶民，親也。今虢公動匱百姓
以盈其違，離民怒神，怨而求利焉，不亦難乎？十九年
晉取虢也。

齊景公畋於梧丘夜猶蚤公姑坐睡而夢有五丈夫
北面倖盧稱無罪焉公覺召晏子而告其所夢公曰
我其嘗殺不辜而誅無罪耶晏子對曰昔者先君靈
公畋五丈夫罟而駭獸故殺之斷其首而葬之曰五
丈夫之丘其此耶公令人掘而求之則五頭同穴而
存焉公曰嘻令吏葬之國人不知其夢也曰君憫白
骨而況于生者乎不遺餘力矣不釋餘智矣故曰人
君之爲善易矣

楚昭王問於觀射父曰周書所謂重黎實使天地不
通者何也若夫然民將能答天乎對曰非此之謂也

古者民神不雜。民之精爽不弔貳者。而又能齊肅。衷正其知能。上下比義。其聖能光遠。宣朗其明能。光昭之。其聰能聽徹之。如是則明神降之。在男曰覲。在女曰巫。是使制神之處。位次主而爲之。牲器時服而後使先聖之後。之有光烈而能知山川之號。高祖之主宗廟之事。昭穆之世。齊敬之勤。禮節之宜。威儀之則。容貌之崇。忠信之質。禋潔之服。而敬恭明神者。以爲之。祝使名姓之後。能知四時之生。犧牲之物。玉帛之類。采服之儀。藝器之量。次主之度。屏攝之位。壇場之所。上下之神。氏姓之出。而心率舊典者。爲之宗。於是

乎有天地神民類物之官。謂之五官各司其序。不相亂也。民是以能有忠信。神是以能有明德。民神異業。敬而不瀆。故神降之嘉生。民以物享。禍災不至。求用不匱。及少皞之衰也。九黎亂德。民神雜揉。不可方物。夫人作享。家爲巫史。無有要質。民匱于祀而不知其福。烝享無度。民神同位。民瀆齊盟。無有嚴威。神狎民則不蠲。其爲嘉生不降。無物以享。禍災荐臻。莫盡其氣。顓頊受之。乃命南正重司天以屬神。命火正黎司地以屬民。使復舊常。無相浸瀆。是謂絕地。天通其後。三苗復九黎之德。堯復育重黎之後。不忘舊者。使復

典之以至於夏商故重黎氏世叙天地而別其分王者也其在周程伯休父其後也當宣王時失其官守而爲司馬氏寵神其祖以取威于民曰重實上天黎實下地遭世之亂而莫之能禦也不然夫天地成而不變何比之有

鄭簡公使公孫成子來聘平公有疾韓宣子贊授客館客問君疾對曰寡君之疾久矣上下神祇無不徧諭也而無除今夢黃熊入于寢門不知人殺乎抑厲也邪子產曰以君之明子爲大政其何厲之有僑聞之昔者鯀違帝命殛之於羽山化爲黃熊以入于羽

淵實爲夏郊三代舉之夫鬼神之所及非其族類則
紹其同位是故天子祀上帝公侯祀百辟自卿以下
不過其族今周室少卑晉實繼之其或者未舉夏郊
邪宣子以告祀夏郊董伯爲尸五日公見子產賜之
莒鷄

鄭人相驚以伯有曰伯有至矣則皆走不知所往鑄
刑書之歲二月或夢伯有介而行曰壬子余將殺帶
也明年壬寅余又將殺段也及壬子駟帶卒國人益
懼齊燕平之月壬寅公孫段卒國人愈懼其明月子
產立公孫洩及良止以撫之乃止子大叔問其故子

奎曰鬼有所歸。乃不爲厲。吾爲之歸也。大叔曰公孫洩何爲。子產曰。說也。爲身無義而圖說從。政有所反。之以取媚也。不媚不信。不信民不從也。及子產適晉。趙景之問焉。曰。伯有猶能爲思乎。子產曰。能。人生始化曰魄。既生魄。陽曰魂。用物精多則魂魄彊。是以有精爽。至於神明。匹夫匹婦。彊矣。其魂魄猶能馮依於人。以爲淫厲。况良霄我先君穆公之冑。子良之孫。子耳之子。敝邑之卿。從政三世矣。鄭雖無腆。抑諺曰。蕞爾國而三世執其政柄。其用物也弘矣。其取精也多矣。其族又大。所馮厚矣。而彊處能爲鬼。不亦宜乎。

虢公夢在廟有神人面白毛虎爪執鉞立在西阿公懼而走神曰無走帝今日使晉襲于爾門公拜頽首覺召使噐占之噐曰如君之言則蓐收也天之罰神也天事官成公使囚之且使國人賀夢丹之僑告其諸侯曰虢不久矣吾乃今知之君不度而嘉大國之襲於已也何瘳吾聞之曰大國無道小國襲焉曰服小國傲大國襲焉曰誅民疾君之侈也是以由于逆命今嘉其夢侈必展是天奪之鑒而益其疾也民疾其態天又誑之大國來誅出令而逆宗國既卑諸侯遠已外內無親其誰云救之吾不忍俟將行以其族

適晉三年、號乃亡。

臣聞明於天地之性、不可惑以神恠、知萬物之情、不可罔以非類、諸背仁義之正道、不遵五經之法言、而盛稱奇恠、鬼神廣崇祭祀之方、求報無福之祠、及言世有僊人、服食不終之藥、造典輕舉、登遐倒景、覽觀縣圃、浮游蓬萊、耕耘五德、朝種暮穫、與山石無極、黃冶變化、堅冰淖溺、化色五倉之術者、皆奸人惑衆、挾正道懷詐僞、以欺罔世主、聽其言、洋洋滿耳、若將可遇、求之盪盪、如繫風捕影、終不可得、是以明王距而不聽、聖人絕而不語。昔周史萇弘、欲以鬼神之術、輔

尊靈王會朝諸侯而周室愈微諸侯愈叛楚懷王降
祭祀事鬼神欲以獲福助郤秦師而兵剄地削身辱
國危秦始皇初并天下甘心于神僊之道遺徐福韓
終之屬多齋童男童女入海求神采藥因逃不還天
下怨恨漢興新垣平齊人少翁公孫卿樂大等皆以
僊人黃冶祭祀事鬼使物入海求神采藥貴幸賞賜
累千金大尤尊盛至妻公主爵位重系震動海內元
鼎元封之際燕齊之間方士填目扼腕言有神僊祭
祀致福之術者以萬數其後平等皆以術窮詐得誅
夷狄辜至初元中有天淵玉女鉅鹿神人轅陽侯師

張宗之姦紛紛便起、夫周秦之末、三五之隆、已嘗專
意散財、厚爵祿、竦精神、舉天下以求之矣、曠日經年、
靡有毫釐之驗、足以揆今、經曰、享多儀、儀不及物、惟
曰不享、論語說曰、子不語怪神、唯陛下距絕此類、毋
令姦人有以窺朝者、漢谷永論
神怪疏

王恠除郿令、到官、至釐亭亭、亭長曰、亭有鬼、數殺過客、
不可宿也、恠曰、仁勝凶邪、德除不祥、何鬼之避、卽入
亭止宿、夜中聞有女子稱冤之聲、恠祝曰、有何枉狀、
可前求理乎、女子曰、無衣、不敢進、恠便投衣與之、女
子乃前訴曰、妾夫爲涪令、之官、過宿此亭、亭長無狀、

枉殺妾家十餘口、埋在樓下、悉盜取財貨、恠問亭長
姓名、女子曰、卽今門下游徼者也、恠曰、汝何故數殺
過客、對曰、妾不得白、日自訴、每夜陳寃、客輒眠不見
應、不勝感恚、故殺之、恠曰、當爲汝理此寃、勿復殺良
善也、因解衣於地、忽然不見、明旦召游徼詰問具服
罪、卽收繫、及同謀十餘人、悉伏辜、遣吏送其喪歸鄉
里、於是亭遂清安、

巫祝

齊侯疥、遂痞、期而不瘳、諸侯之賓問疾者、多在梁丘
據、與裔、欸言於公曰、吾事鬼神、神豐於先君、有加矣、今

君疾病爲諸侯憂是祝史之罪也諸侯不知其謂我不敬君盍誅於祝固史嚚以辭賓公說告晏子晏子曰日宋之盟屈建問范會之德於趙武趙武曰夫子之家事治言於晉國竭情無私其祝史祭祀陳信不愧其家事無猜其祝史不祈建以語康王康王曰神人無怨宜夫子之光輔五君以爲諸侯主也公曰據與歟謂寡人能事鬼神故欲誅於祝史子稱是語何故對曰若有德之君外內不廢上下無怨動無違事其祝史薦信無愧心矣是以鬼神用饗國受其福祝史與焉其所以蕃祉老壽者爲信君使也其言忠信

於鬼神其適遇淫君外內頗邪上下怨疾動作辟違
從欲厭私高臺深池撞鐘舞女斬刈民力輸掠其聚
以成其違不恤後人暴虐滯從肆行非度無所還忌
不思謗讟不憚鬼神神怒民痛無悛於心其祝史薦
信。是言罪也。其蓋失數美。是矯誣也。進退無辭。則虛
以求媚。是以鬼神不饗其國。以禍之。祝史與焉。所以
天昏孤疾者。爲暴君使也。其言僭嫚於鬼神。公曰然
則若之何。對曰不可爲也。山林之木。衡鹿守之。澤之
萑蒲。舟鮫守之。數之薪蒸。虞候守之。海之鹽蜃。祈望
守之。縣鄙之人。入從其政。偪介之關。暴征其私。承嗣

大夫彊易其賄。布常無藝。徵歛無度。宮室日更。淫樂不違。內寵之妾。肆奪於市。外寵之臣。僭令於鄣。私欲義求。不給則應。民人苦病。夫婦皆詛。祝有益也。詛亦有損。聊攝以東。姑尤以西。其爲人也多矣。雖有善祝。豈能勝億兆人之詛。君若欲誅於祝史。脩德而後可。公說使有司寬政。毀關去禁。薄歛已責。

齊有彗。星齊侯使禳之。晏子曰。無益也。祇取誣焉。天道不諂。不貳其命。若之何禳之。且天之有彗也。以除穢也。君無穢德。又何禳焉。若德之穢。禳之何益。

齊大旱。景公召群臣問曰。天不雨久矣。民且有饑色。

吾使人卜之。祟在高山廣水。寡人欲少賦歛以祠靈山。可乎？群臣莫對。晏子進曰：「不可。祠此無益也。夫靈山固以石爲身，以草木爲髮。天久不雨，髮將焦，身將熱。彼獨不欲雨乎？祠之無益。」景公曰：「不然，吾欲祠河伯，可乎？」晏子曰：「不可。祠此無益也。夫河伯以水爲國，以魚鱉爲民。天久不雨，水泉時下，百川竭，國將亡，民將滅矣。彼獨不用雨乎？祠之何益？」景子曰：「今爲之奈何？」晏子曰：「君誠避宮殿，暴露與靈山河伯共憂其幸而雨乎？」于是景公出野，暴露三日。天果大雨，民盡得插樹。景公曰：「善哉！」晏子之言，可無用乎？其惟有德也。

吳伐陳復脩舊怨也。楚子曰：「吾先君與陳有盟，不可以不救。」乃救陳師于城父。卜戰不吉，卜退不吉。王曰：「然則死也。」再敗楚師，不如死。棄盟逃讐，亦不如死。死一也。其死讐乎？命公子申爲王。不可，則命公子結。亦不可，則命公子啓。五辭而後許。將戰，王有疾。庚寅，昭王攻大冥，卒于城父。子閭退曰：「君王舍其子而議羣臣，敢忘君乎？從君之命，順也。立君之子，亦順也。二順不可失也。」與子西子期謀潛師，閉塗，逆越女之子章，立之而後還。是歲也，有雲如衆赤鳥夾日以飛。三日，楚子使問諸周大史。周大史曰：「其當王身乎？若禱之。」

可移於令尹司馬。王曰：「除腹心之疾，而寘諸股肱，何益？不穀不有大過，天其大譴，有罪受罰，又焉移之？」遂弗祭。初，昭王有疾，卜曰：「河爲祟。」王弗祭，大夫請祭諸郊。王曰：「三代命祀，祭不越望。江漢睢漳，楚之望也。禍福之至，不是過也。不穀雖不德，河非所獲罪也。」遂弗祭。孔子曰：「楚昭王知大道矣，其不失國也宜哉！」

邾文公卜徙於繹，史曰：「利於民，不利於君。」君曰：「苟利於民，寡人之利也。天生烝民，而樹之君，以利之也。民旣利矣，孤必與焉。」侍者曰：「命可長也。」君胡不爲？君曰：「命在牧民，歟之短長，時也。民苟利矣，吉孰大焉？」遂徙。

於繹

韓褐子濟於河律人告曰夫人過於此者未有不快
用者也而子不用乎韓褐子曰天子祭海內之神諸
侯祭封域之內大夫祭其親士祭其祖禰褐也未得
事河伯也津人申楫舟中水而運津人曰向也役人
固已告矣夫子不聽役人之言也今舟中水而運甚
殆治裝衣而下遊乎韓子曰吾不爲人之惡我而改
吾志不爲我將歿而改吾義言未已舟汎然行

晉元帝所幸鄭貴嬪有疾以祈禱頗廢萬機顧榮上
牋云昔文王父子兄弟乃有三聖可謂窮理者也而

文王日昃不暇食。周公一沐三握髮。何哉。誠以一日萬幾。不可不理。一言蹉跌。患必及之。故也。當今衰季之末。屬亂離之運。而天子流播豺狼塞路。公宜露營野次。星言夙駕。伏軾怒蛙。以募勇士。懸膽于庭。以表辛苦。貴嬪未安。藥石實急。禱祀之事。誠復可脩。豈有便塞叅佐白事。斷賓客問訊。今彊賊臨境。流言蒲國人心。萬端去就。紛紜願冲虛納下。廣延僞彥。思畫今日之要塞。鬼道淫祀。弘九合之勤。雪天下之耻。則群生有賴。開泰有期矣。

臣聞左道亂俗。妖言惑衆。在昔之法。皆殺無赦。蓋以

奸臣逆節狂賊亂規多假鬼神搖動耳目漢之張角
晉之孫恩偶失防閑遂至屯聚國家宜有嚴制以肅
多方切以當州東引七閩南控百粵編氓右鬼舊俗
尚巫在漢樂巴已嘗翦理爰從近歲傳習滋多假託
機祥愚弄黎庶勦絕性命規取貨財皆於所居塑畫
魑魍陳列幡幟鳴擊鼓角謂之神壇嬰孺禳祿已令
寄育字曰壇留壇保之類及其稍長則傳習妖法驅
爲童隸民之有病則門施符術禁絕往還斥遠至親
屏去僕物家人營藥則曰神不許服病者欲飲則云
神未聽餐率令疫人歿於饑渴洎至亡者服用又言

餘崇所憑入不敢留規以自分若幸而獲免家之所資假神而言無求不可其間有孤子單族首面勿妻或絕戶以圖財或害夫而納婦浸淫既久習熟爲常民被非辜了不爲怪奉之愈謹信之益深從其言甚於典章畏其威重於官吏奇神異像圖繪歲增邪錄妖符傳寫日夥小則雞豚致祀歛以還家大則歌舞聚人食其餘胙婚葬出處動必求師劫盜鬪爭行須作水蠹耗衣食眩惑里閭設欲扇搖不難連結在於典憲具有章條其如法未勝奸孽弗瘳疾宜頒峻典以革祆風當州師巫一千九百餘戶臣已勒令改業

歸農及攻習鍼灸之脉所有首納袄妄神像符籙神
衫神杖魂巾魂帽鍾角刀笏沙羅等一萬一千餘事
已令焚毀及納官伏乞朝廷嚴賜條約所冀屏除巨
害保宥羣生杜漸防萌少裨萬一

妖恠

龍有欲防
其求

鄭大水龍關於時門之外汴淵國人請爲榮焉子產
弗許曰我闕龍不我覲也龍闕我獨何覲焉穰之則
彼其室也吾無求於龍龍亦無求於我乃止也

鄭厲公自櫟侵鄭及大陵獲傅瑕傅瑕曰苟舍我吾
請納君與之盟而赦之六月甲子傅瑕殺鄭子及其

二子而納厲公。初，內蛇與外蛇鬪於鄭南門中。內蛇
歿六年而厲公入。公問之問於申繻，曰：「猶有妖乎？」對
曰：「人之所忌，其氣燄以取之。妖由人興也。人無釁焉，
妖不自作。人棄常則妖興，故有妖。」

石言于晉魏榆。晉侯問於師曠，曰：「石何故言？」對曰：「石
不能言。或馮焉。不然，民聽濫也。」柳臣又聞之，曰：「作事
不時，怨讟動于民，則有非言之物而言。今宮室崇侈，
民力彫盡，怨讟竝作，莫保其性。」石言不亦宜乎？於是
晉侯方築廐祁之宮，叔向曰：「子野之言，君子哉！君子
之言信而有徵，故怨遠於其身。小人之言僭而無徵。」

故怨咎及之。詩曰哀哉不能言匪舌是出唯躬是瘁
哿矣能言巧言如流俾躬處休其是之謂乎是宮也
成諸侯必叛君必有咎夫子知之矣

趙簡子問子翟封荼曰吾聞翟雨穀三日信乎曰信
又聞雨血三日信乎曰信又聞馬生牛牛生馬信乎
曰信簡子曰大哉妖亦足以亡國矣對曰雨穀三日
蚩風之所飄也雨血三日鷲鳥擊於上也馬生牛牛
生馬雜牧也此非翟之妖也簡子曰然則翟之妖奚
也對曰其國數散其君幼弱其諸卿貨其大夫比黨
以求祿爵其百官肆斷而無告其政令不竟而數化

其志巧貪而怨。此其妖也。

晉武帝時龍見武庫井中群臣將上賀孫楚上言聞武庫井中有二龍群臣或有謂之禎祥而稱賀者或有謂之非祥無所賀者可謂楚既失之而齊亦未爲得也夫龍或附鱗潛于重泉或仰攀雲漢游乎蒼昊而今蟠于坎井同於蛙蝦者豈獨荒庫之士或有隱伏廝役之賢沒于行伍故龍見光景有所惑悟願陛下赦小過舉賢才垂夢于傅岩望想于渭濱脩學官起淹滯申命公卿舉獨行君子可悼風厲俗者又舉亮拔秀異之才可以撥煩理難矯世抗言者無繫世

族必先逸賤夫戰勝攻取之勢并兼混一之威五伯之事韓白之功耳至於制禮作樂闡揚道化甫是士人出筋力之秋也伏願陛下擇狂夫之言

夫中國聖人之常治也四民之所常居也衣冠之所常聚也而髡髮左衽不士不農不工不商爲夷者半中國可恠也夫中國道德之所治也禮樂之所施也五常之所被也而汗漫不經之教行焉妖誕幻惑之說滿焉可恠也夫天子七廟諸侯五廟大夫三廟士二廟庶人祭于寢所以不忘孝也而忘而祖廢而祭去事夷狄之鬼可恠也噫一日蝕一星縮則天爲之

不、明、一、山、崩、一、川、竭、則、地、爲、之、不、寧、釋、老、之、爲、恠、也、
千、有、餘、年、矣、中、國、蠹、壞、亦、千、有、餘、年、矣、不、知、更、千、餘、
年、釋、老、之、爲、恠、也、如、何、中、國、之、蠹、壞、也、如、何、堯、舜、禹、
湯、文、武、周、公、孔、子、不、生、乎、或、曰、天、下、不、謂、之、恠、子、
謂、之、恠、今、有、子、不、謂、恠、而、天、下、謂、之、恠、請、爲、子、而、言、
之、可、乎、曰、奚、其、爲、恠、也、曰、昔、揚、翰、林、欲、以、文、章、爲、宗、
於、天、下、憂、天、下、未、盡、信、已、之、道、於、是、育、天、下、人、目、聾、
天、下、人、耳、使、天、下、人、目、盲、不、見、有、周、公、孔、子、孟、軻、揚、
雄、文、中、子、吏、部、之、道、使、天、下、人、耳、聾、不、聞、有、周、公、孔、
子、孟、軻、揚、雄、文、中、子、吏、部、之、道、俟、周、公、孔、子、孟、軻、揚、

雄文中子吏部之道滅乃殫其育開其聾使天下唯
見已之道唯聞已之道莫知其他今天下有楊億之
道四十年矣今楊億窮研極態綴風月弄花草淫巧
侈麗浮華纂組刑鏤聖人之經破碎聖人之言離析
聖人之意蠹傷聖人之道使天下不爲書之典謨禹
貢洪範詩之雅頌春秋之經易之繇爻十翼而爲楊
億之窮研極態綴風月弄花草淫巧侈麗浮華纂組
其爲恠大矣是人欲去其恠而就於無恠今天下反
謂之恠而恠之呼嗚

宋石介
恠說二

醫

晉平公有疾秦景公使醫蘇視之出曰疾不可爲也是謂遠男而近女惑以生蠱非鬼非食惑以喪志良臣不生天命不祐若君不歿必失諸侯趙文子聞之曰武從二三子以佐君爲諸侯盟主於今八年矣內無苛慝諸侯不二子胡曰良臣不生天命不祐對曰自今之謂蘇聞之曰直不輔曲明不規闇搖木不生危松栢不生埤吾子不能諫惑使至於生疾又不自退而寵其政八年之謂多矣何以能久文子曰醫及國家乎對曰上醫醫國其次疾人固醫官也文子曰子稱蠱何實生之對曰蠱之慝穀之飛實生之物莫

伏於蠱。莫嘉於穀。穀興蠱伏而章明者也。故食穀者
晝選男德以象穀明。宵靜女德以伏蠱隱。今君一之。
是不饗穀而食蠱也。是不昭穀明而咀蠱也。夫之蟲
咀爲蠱。吾是以云。文子曰。君其幾何。對曰。若諸侯服
不過三年。不服不過十年。過是晉之殃也。是歲趙文
子卒。諸侯叛晉。十年平公薨。

醫扁鵲見秦武王。武王示之病。扁鵲請除左右曰。君
之病在耳之前。目之下。除之未必已也。將使耳不聰。
目不明。君以告扁鵲。扁鵲怒而投其石曰。君與知之
者謀之。而與不知者敗之。使此知秦國之政也。則君

八
一舉而亡國矣。

漢郭玉者廣漢雒人也。初有老父不知何出常漁釣于涪水因號涪翁。乞食人間見有疾者時下鍼石輒應時而郊乃著鍼經診脉法傳于世。弟子程高尋求積年翁乃授之高亦隱跡不仕。玉少師事高學方診六徵之枝陰陽隱測之術。和帝時爲太醫丞多有効應。帝奇之仍試令嬖臣美手腕者與女子雜處帷中使玉各診一手問所疾苦。王曰左陰右陽脉有男女狀若異人。臣疑其故。帝嘆息稱善。玉仁愛不矜雖貧賤廝養必盡其心力而醫療貴人時或不愈帝乃令

貴人羸服變處一鍼卽差召玉詰問其狀對曰醫之
爲言意也。腠理至微隨氣用巧鍼石之間毫芒卽乖
神存于心手之際可得解而不可得言也。夫貴者處
尊高以臨臣臣懷怖懾以承之其爲療也有四難焉
自用意而不任臣一難也將身不謹二難也骨節不
能使藥三難也好逸惡勞四難也。鍼有分寸時有破
漏重以恐懼之心加以裁慎之志臣意且猶不盡何
有於病哉此其所以爲不愈也。帝善其對。

史稱華佗以特能厭事爲曹公所怒荀文若請曰佗
術實工人命係焉宜議能以宥曹公曰憂天下無此

鼠輩耶遂考竟佗至蒼舒病且歿見醫不能生始有悔之之歎嗟乎以操之明略見幾然猶輕殺材能如是文若之智力地望以的然之理攻之然猶不能反其志執柄者之患真可畏諸亦可慎諸原夫史氏之書于冊也是使後之人寬能者之刑納賢者之論而懲暴者之輕殺故自恃能至有悔悉書焉後之惑者復用是爲口實悲哉夫賢能不能無過苟寘于理矣或必有寬之之請彼壬人皆曰愛天下無材耶曾不知悔之日方痛材之不可無也或必有惜之之難彼壬人皆曰譬彼歿矣將若何曾不知悔之日方痛生

之不可再出。可不謂大哀乎。夫以佗之不宜殺。昭昭然不足言也。獨病夫史書之義。是將推而廣耳。吾觀自曹魏以來。執死生之柄者。用一恚而殺材能衆矣。又焉用書佗之事爲。嗚呼。前事之不忘。期有勸且懲也。而暴者宿以藉口。以快意。孫權則曰。曹孟德殺孔文舉矣。孤於處。翻何如。而孔融亦以應泰山殺孝廉自譬。仲謀近霸朝者。文舉有高名。然猶以可懲爲故事。矧他人哉。唐劉禹錫
葬佗論

周官載醫掌養萬民之疾病。蓋凡受疾者。舉可治也。唯久之不治。遂萃以死。未見其有始疾而不可治者。

也巴楚之地俗信巫鬼實自古而然當五氣相沴或致厲疫之苦率以謂天時被是疾非醫藥所能攻故請禱鬼神無少暇雞豚鴨羊之薦唯恐不豐迨其不能則莫不自咎事鬼神之未至或幸而愈乃曰由禱之勤也薦之數也不然烏能與天時抗乎又有治之不蚤其疾氣之毒日相薰灼一家之人皆至乎病故雖親友之厚百步之外不敢望其門廬以至得病之家懼相遷染子畏其父婦避其夫若富財之人尚得一巫覡守之其窮匱者獨僵卧呻吟一室而已如是則不特絕醫藥之饋其飲食之給蓋亦闕如是以處

者未嘗不十八九而民終不悟余嘗訪於人其患非
宅繇覲師之勝醫師耳

宋龔鼎臣
述醫論

卜

城濮之戰晉文公謂咎犯曰吾卜戰而龜燂我迎歲
彼背歲彗星見彼操其柄我操其標吾又夢與荆王
搏彼在上我在下吾欲無戰子以爲何如咎犯對曰
卜戰龜燂是荆人也我迎歲彼背歲彼去我從之也
彗星見彼操其柄我操其標以掃則彼利以擊則我
利君夢與荆王搏彼在上君在下則君見天而荆王
伏其罪也且我以宋衛爲主齊秦輔我我合天道獨

以人事固將勝之矣文公從之荆人大敗

自古受命而王王者之興何嘗不以卜筮決于天命哉其於周尤甚及秦可見代王之入任于卜者太卜之起由漢興而有焉司馬季主者楚人也卜于長安東市宋忠爲中大夫賈誼爲博士同日俱出洗沐相從論議誦易先王聖人之道術究徧人情相視而嘆賈誼曰吾聞古之聖人不居朝廷必在卜筮之中今吾已見三公九卿朝士大夫皆可知矣談之卜數中以觀采二人卽同輿而之市游于卜肆中天新雨道少人司馬季主閒坐弟子三四人侍方辯天地之道

日月之運陰陽吉凶之本二大夫再拜謁司馬季主
視其狀貌如類有知者卽禮之使弟子延之坐坐定
司馬季主復理前語分別天地之終始日月星辰之
紀差以仁義之際列吉凶之符語數千言莫不順理
宋忠賈誼瞿然而悟獵纓正襟危坐曰吾望先生之
狀聽先生之辭小子竊觀于世未嘗見也今何居之
卑何行之汙司馬季主捧腹大笑曰觀大夫類有道
術者今何言之陋也何辭之野也今夫子所賢者何
也所高者誰也今何以卑汙長者二君曰尊官厚祿
世之所高也賢才處之今所處非其地故謂之卑言

不信行不驗取不當故謂之汙夫卜筮者世俗之所
賤簡也世皆言曰夫卜者多言誇嚴以得人情虛高
人祿命以詭人志擅言禍災以傷人心矯言鬼神以
盡人財厚求拜謝以私于已此吾之所耻故謂之卑
汙也司馬季主曰公且安坐公見夫被髮童子乎日
月照之則行不照則止問之日月疵瑕吉凶則不能
理由是觀之能知別賢與不肖者寡矣賢之行也直
道以正諫三諫不聽則退其譽人也不望其報惡人
也不顧其怨以便國家利衆爲務故官非其任不處
也祿非其功不受也見人不正雖貴不敬也見人有

汙雖尊不下也得。不爲喜去。不爲恨非其罪也。雖累辱而不愧也。今公所謂賢者。皆可爲羞矣。卑疵而前。娥趨而言相引。以勢相導。以利比周。賓正以求尊譽。以受公奉事私利。枉正法。獵農民。以官爲威。以法爲機。求利逆暴。譬無異于操白刃劫人者也。初試官時。倍力爲巧詐飾虛功。執空文。以調主上用。居上爲右。試官不讓賢。陳功見僞。增實以無爲。有以少爲多。以求便勢尊位。食飲驅馳從姬歌兒。不顧於親犯法害民虐公家。此夫爲盜不操矛弧者也。攻而不用弦刃者也。欺父母未有罪而弑君未伐者也。何以爲高賢者。

才乎。盜賊發不能禁。夷貊不服不能懾。奸邪起不能塞。官耗亂不能治。四時不和不能調。歲穀不熟不能適。才賢不爲是不忠也。才不賢而託官位利上奉妨賢者。處是竊位也。有人者進有財者禮是僞也。子獨不見鵙鴞之與鳳凰翔乎蘭芷芎藭棄于廣野蒿蕭成林使君子退而不顯衆。公等是也。述而不作。君子義也。今夫卜者必法天地象四時順於仁義分策定卦旋式正基然後言天地之利害事之成敗昔先王之定國家必先龜策日月而後乃敢代正時日乃後入家產子必先占吉凶後乃有之。自伏羲作八卦周

文王演三百八十四爻而天下治越王句踐倣文王
八卦以破敵國霸天下由是言之卜筮有何負哉且
夫卜筮者掃除設坐正其冠帶然後乃言事此有禮
也言而鬼神或以饗忠臣以事其上孝子以養其親
慈父以畜其子此有德者也而以義置數十百錢病
者或以愈且死或以生患或以免事或以成嫁子娶
婦或以養生此之爲德豈直數十百錢哉此夫老子
所謂上德不德是以有德今夫卜筮者利大而謝少
老子之云豈異于是乎莊子曰君子內無饑寒之患
外無劫奪之憂居上而敬居下不爲害君子之道也

今夫卜筮者之爲業也積之無委聚藏之不用府庫
徙之不用輜車負裝之不重止而用之無盡索之時
持不盡索之物游於無窮之世雖莊氏之行未能增
於是也子何故而云不可卜哉天不足西北星辰西
北移地不足東南以海爲池日中必移月滿必虧先
王之道乍存乍亡公責卜者言必信不亦惑乎公見
夫談士辨人乎慮事定計必是人也然不能以一言
說人主意故言必稱先王語必道上古慮事定計飾
先王之成功語其敗筭以恐喜人主之志以求其欲
多言誇嚴莫大於此矣然欲彊國成功盡忠于上非

此不立。今夫卜者，導惑教愚也。夫愚惑之人，豈能以一言而知之哉？言不厭多，故駉驥不能與罷驢爲駟，而鳳凰不與燕雀爲群。而賢者亦不與不肖者同列。故君子處卑隱，以辟衆；自匿，以辟倫。微見德順，以除群害。以明天性，助上養下，多其功利，不求尊譽。公之等，喁喁者也。何知長者之道乎？宋忠、賈誼忽而自失，芒手無色，悵然噤口，不能言。於是攝衣而起，再拜而辭，行洋洋也。出市門，僅能自上車，伏軾低頭，卒不能出氣。居三日，宋忠見賈誼于殿門外，乃相引屏語，相謂曰：「嘆曰：道高益安，勢高益危。居赫赫之勢，失身且

有日矣夫。上而有不審，不見奪精爲人主計而不審。身無所處，此相去遠矣。猶天冠地履也。此老子之所謂無名者，萬物之始也。天地曠曠，物之熙熙，或安或危，莫知居之。我與若何足預彼哉？彼久而愈安，雖曾氏之義未有以異也。久之宋忠使匈奴，不至而還，抵罪而賈誼爲梁懷王傅，王墜馬薨，誼不食毒恨而死。此務華絕根者也。太史公曰：古者卜人所以不載者，多不見于篇。及至司馬季主，余志而著之。

漢司馬遷曰者

列傳

漢自武帝頗好方術，天下懷協道執之士莫不負策

抵掌順風而屈焉後王恭矯用符命及光武尤信讖
言士之赴趨時宜者皆馳騁穿鑿爭談之也故王梁
孫咸名應圖籙越登槐鼎之任鄭興賈逵以附同稱
顯桓譚尹敏以乖忤淪敗自是習爲內學尙奇文貴
異數不乏於時矣是以通儒碩生忿其奸妄不經奏
議慷慨以爲宜見藏擯子長亦云觀陰陽之書使人
拘而多忌蓋爲此也

范曄方
術傳論

相

天相之相在於清明將之相在於雄傑清明者珠玉
是也爲天下所寶雄傑者虎兇是也爲百獸所伏然

清者必得大權不能享豐富雄者必當昌後不能得
大柄兼而有之者在乎粹美而已余頃歲蒞淮海屬
縣有盱眙而山多珉玉剖而爲器清明洞徹雖水精
明冰不如也而價不及于凡玉終不得爲至寶以其
不粹也清而粹者天也故高不可測清而徹者泉也
故深亦可窺此其大略也余嘗精而求之多士以才
爲命婦人以色爲命天賦是美者必將有以貴之才
高者雖孟嘗眇小蔡澤折頸亦居萬人之上色美者
雖鉤弋之拳子夫之賤亦爲萬乘之偶然不如清而
粹者必身名俱榮福祿終奉張良是也擇士能用此

術可以拔十得九無所疑也

李德裕相論

八編類纂

卷八

人類

三九

斷可以對十格式無訛錄也

李麟林撰